




歲功典第六十二卷

孟秋部彙考

易經

天地否卦

三三

本義否閉塞也七月之卦也正與泰反

詩經

豳風七月章

七月流火

正義

昭三年左傳張趯曰火星中而寒暑退服虔云火大火星也季冬十二月平旦正中

在南方大寒退季夏六月黃昏火星中大暑退是火爲寒暑之候事

朱注

七月斗建申之月夏之七

月也流下也火大火心星也以六月之昏加於地之南方至七月之昏則下而西流矣

七月鳴鵒

疏

五月陰氣動而伯勞鳴是將寒之候也月令仲夏鵒始鳴是中國正氣五月則鳴今

豳地晚寒鳥初鳴之候從其鄉土之氣焉故至七月鵒始鳴也

大朱子

曰鵒以七月鳴則陰氣至

而衆芳歇矣

七月在野

箋

自七月在野至十月入我牀下皆蟋蟀也

疏

蟋蟀之蟲六月居壁中至七月則在田

野之中

禮記

月令

孟秋之月日在翼昏建星中旦畢中其日庚辛其帝少皞其神蓐收其蟲毛其音商律中夷則其數九其味辛其臭腥其祀門祭先肝

陳

翼宿在巳鶉尾之次少皞白精之君金天氏也蓐收金官之

臣少皞氏之子該也夷則申律長五寸七百二十九分寸之四百五十一九金之成數也辛腥皆屬金秋陰氣出故祀門祭先肝金克木也

涼風至白露降寒蟬鳴鷹乃祭鳥用始行戮

陳此記申月之候

天子居總章左个乘戎路駕白駱載白旂衣白衣服白玉食麻與犬其器廉以深

陳

總章左个太

寢西堂南偏廉亦矩之義深則收藏之意

是月也以立秋先立秋三日太史謁之天子曰某日立秋盛德在金天子乃齊立秋之日天子親帥三公九卿諸侯大夫以迎秋於西郊還反賞軍帥武人於朝天子乃命將帥選士厲兵簡練桀俊專任有功以征不義誅暴慢以明好惡順彼遠方

陳好惡明則遠方順服

是月也命有司修法制繕囹圄具桎梏禁止姦慎罪邪務搏執

陳姦在人心故當有以禁止之邪

見於行故慎以罪之

命理瞻傷察創視折審斷決獄訟必端平戮有罪嚴斷刑

陳嚴者謹重之意非峻急之謂也

天地始肅不可以贏

陳陽道常饒陰道常乏故贊化者不可使陰氣之贏也

是月也農乃登穀天子嘗新先薦寢廟命百官始收斂完隄防謹壅塞以備水潦脩宮室圻垣牆補

城郭

陳所以爲水潦之備者以月建在酉酉中有畢星好雨也

按八月月建在酉孟秋爲仲秋之備故注云

是月也毋以封諸侯立大官

陳記者但知賞以春夏刑以秋冬之義不知古者嘗祭之時則有出

田邑之制故注謂禁封諸侯及割地爲失其義也

毋以割地行大使出大幣

陳以其違收斂之令也

孟秋行冬令則陰氣大勝介蟲敗穀戎兵乃來行春令則其國乃旱陽氣復還五穀無實行夏令則國多火災寒熱不節民多瘡疾

爾雅

月陽

七月爲相

尙書大傳

順天道

天子以秋決獄訟斷刑罰趣收斂以順天道以佐秋殺

素問

診要經終論篇

七月八月陰氣始殺人氣在肺

注始殺者氣始肅殺也申酉二月屬金而人氣在肺

汲冢周書

時訓解

立秋之日涼風至又五日白露降又五日寒蟬鳴涼風不至無嚴政白露不降民多邪病寒蟬不鳴人皆力爭處暑之日鷹乃祭鳥又五日天地始肅又五日禾乃登鷹不祭鳥師旅無功天地不肅君臣乃口農不登穀暖氣爲災

呂氏春秋

季夏紀音律篇

夷則之月修法飭刑選士厲兵詰誅不義以懷遠方

注夷則七月也懷柔也

史記

律書

北至於罰罰者言萬物氣奪可伐也北至於參參言萬物可參也故曰參七月也律中夷則夷則言陰氣之賊萬物也其於十二子爲申申者言陰用事申賊萬物故曰申

漢書

律歷志

夷則則法也言陽氣正法度而使陰氣夷當傷之物也位於申在七月

淮南子

天文訓

大暑加十五日指背陽之維則夏分盡故曰有四十六日而立秋涼風至音比夾鍾加十五日指申則處暑音比姑洗

夷則之數五十一主七月上生夾鍾

太陰在戌歲名曰閼茂歲星舍翼軫以七月與之晨出東方營室東壁爲對

時則訓

孟秋之月招搖指申昏斗中旦畢中其位西方其日庚辛盛德在金其蟲毛其音商律中夷則其數九其味辛其臭腥其祀門祭先肝涼風至白露降寒蟬鳴鷹乃祭鳥用始行戮天子衣白衣乘白駟服白玉建白旗食麻與犬服八風水爨柘燃火西宮御女白色衣白采撞白鐘其兵戈其畜狗朝於

總章左个以出秋令求不孝不悌戮暴傲慢而罰之以助損氣立秋之日天子親率三公九卿大夫以迎秋於西郊還乃賞軍率武人於朝命將率選卒厲兵簡練傑俊專任有功以征不義誅暴慢順彼四方命有司修法制繕囹圄禁姦塞邪審決獄平詞訟天地始肅不可以贏是月農始升穀天子嘗新先薦寢廟命百官始收斂完隄防護障塞以備水潦修城郭繕宮室毋以封侯立大官行重幣出大使行是月令涼風至三旬孟秋行冬令則陰氣大勝介蟲敗穀戎兵乃來行春令則其國乃旱陽氣復還五穀無實行夏令則冬多火災寒暑不節民多瘧疾七月官庫其樹棟

六合

孟春與孟秋爲合孟春始贏孟秋始縮故七月失政正月大寒不解

大戴禮記

夏小正

七月蒹葭華未莠則不爲葭葭莠然後爲葭葭故先言蒹捭子肇肆肇始也肆遂也言其始遂也其或曰肆殺也湟療生葦湟下處也有湟然後有療有療而後有葦葦也爽死爽也者猶疏也葦蒹葦

古今圖書集成
也者有馬帚也漢案戶漢也案戶也者直戶也言正南北也寒蟬鳴蟬也者蜩螗也初昏織女正東鄉時有霖雨灌荼灌聚也荼藿葦之莠爲蔣楮之也藿未秀爲莢葦未秀爲蘆斗柄縣在下則旦說文

申月

申神也七月陰氣成體自申東從曰自持也吏以舖時聽事申旦政也
晉書

樂志

七月之辰謂爲申申者身也言時萬物身體皆成就也

七月之管名爲夷則夷平也則法也謂萬物將成平均皆有法則也

梁元帝纂要

孟秋

七月曰孟秋首秋初秋上秋肇秋蘭秋又曰涼月

齊民要術

七月事宜

七月四日命置麴室具箔撻取淨艾六日饌治五穀磨具七日遂作麴及曝經書與衣作乾糗採蔥耳處暑中向秋節浣故製新作捨薄以備始涼糶大小麥豆收織練

隋書

禮儀志

孟秋迎太白候太白夕見於西方先見三日大司馬戒期建旗於陽武門外六軍士馬俱介冑集旗下侍臣文武俱介冑奉迎皇帝警蹕以出如常儀而無鼓角皇帝就位行三獻之禮獻事訖燔燎賜胙而還

農政全書

孟秋事宜

栽種 蕎麥 蒿菜 葱 苜蓿 蘿蔔 赤豆 薑 菠菜 宜月未日 蔓菁 早菜 冬葵 芥菜

立秋
前菜

收藏 割藍 米醋 鹹豉 茄乾 角蒿可辟蛙 芙蓉葉治腫 瓜乾 瓜種 瓜蒂 採松子

紫蘇 地黃 花椒 荊芥 楮子 松柏子 糟茄 糟瓜 醬瓜 荷葉

雜事 分薤 剝棗 刈草 作澱 斫伐竹木 耕菜地 收黃葵花治湯火傷 秋耕宜早恐霜後

掩入陰氣

農事占候

七月秋時到秋六月秋便罷休 朝立秋暮颼颼夜立秋熱到頭 立秋日天晴萬物少得成熟小

雨吉大雨主傷禾齊民要術云晴主歲稔未知孰是 有雷損晚稻諺云秋霹靂損晚穀大抵秋後

雷多晚稻少收非但忌此日 喜西南風主田禾倍收諺云三日三石四日四石 七月有雨名洗

車雨主八月有蓼花諺云七月七無洗車八月八無蓼花

遵生八牋

臞仙月占

七月甲子日忌雷主多暴疾晦日忌風主多癰

七月事宜

孝經緯曰大暑後十五日斗指坤爲立秋秋者擎也物於此而擎斂也後十五日斗指申爲處暑言
漬暑將退伏而潛處也律夷則夷者傷也則法也言金氣始肅萬物於此凋傷猶被刑戮之法也提
要曰七月爲蘭月

是月也天道東北行作事出行宜向東北吉不宜用申日犯月建作事不吉

雲笈七籤曰是月十六日剪指甲燒灰服之能滅九蟲三尸

又曰十一日取枸杞煎湯沐浴令人不老不病二十三日沐令髮不白二十五日沐令人壽長

常氏日錄曰七月上甲日採枸杞花八月上酉日治服之

千金月令曰七月暑烝將伏宜食稍涼以爲調攝法用竹葉一把梔子二個切碎用水熬煎澄清去
渣用淘粳米磨作泔粉服

神仙餌松實法七月取松卵中仁去木皮搗如膏每服雞子大一團日三服久服身輕三百日後可

行五百里之遠卽各山松卵內小子過七月卽破出無尋矣非常食北來大松子也

破音電

竹葉粥中暑者宜用竹葉一握山梔一枚煎湯去渣下米煮粥候熟下鹽花點之進一二杯卽愈是月二十三日二十八日拔白永不再生

七月五日是三會日宜修迎秋齋

七月事忌

七月日時不宜用申犯月建百事不利初八二十二忌裁衣交易

初七日勿想惡事

白雲忌曰七月勿食尊上有蠲蟲害人勿食韭能損目

千金方曰勿食鹿獐動氣勿食茱萸傷神氣

孫真人曰勿食雁傷人勿多食菱肉動氣勿食生蜜令人暴下霍亂勿食豬肺勿多食新薑

法天生意曰立秋後十日瓜宜少食

楊公忌曰初一日二十九日不宜問疾

是月初七爲道德臘十五日爲中元二日戒夫婦入房

七月修養法

秋七月審天地之氣以急正氣早起早臥與雞俱起纔緩其形收斂神氣使志安寧卦否否者塞也天地塞陰陽不交之時也故君子勿妄動生氣在午坐臥宜向正南

孫真人養生曰肝心少氣肺臟獨旺宜安靜性情增鹹減辛助氣補筋以養脾胃毋冒極熱勿恣涼冷毋發大汗保全元氣

賞心樂事

七月

叢奎閣前乞巧 餐霞軒五色鳳仙花 立秋日秋葉 玉照堂玉簪 西湖荷花 南湖觀魚
應絃齋東葡萄 霞川水荳 珍林剝棗

直隸志書

各省風俗
同者不載

東安縣

七月六日掛地頭紙

永平府

孟秋月朔忌立秋處暑忌朔人不安

雄縣

七月六日田家以楮錢挂地頭祈穀

肅寧縣

七月十四日天地位下陳瓜果列麻穀焚香楮并薦祖先次日挈祭物拜墓

饒陽縣

孟秋月處暑東風主麥不成南風主天下冷西風主萬物不成北風主天下有水七月朔日風雨主米貴人民不安

禹城縣

七月十四日祭新麻科

山東志書

陽信縣

處暑七月中執菜

壽光縣

七月十四日祭於家必以麻穀之屬報賽之遺也

登州府

七月朔婦女祀海神廟絡繹不絕至七日乃罷

陝西志書

平涼府

七月旋覆玉簪青木香始華桃李始熟婦女以果茶餅酒繡刺針工夜乞巧於天孫七日乃止望日祭祖妣獻早禾或祭墓是月也寒山麥豆苧麥始盡登種冬蔬蔓菁諸芥及松核桃杏李種復芸秋禾覆耕麥地鳥獸始不字高山遠塞霜

江南志書

吳縣

七月初田夫耕耘甫畢各釀錢祀猛將曰燒青苗橫塘木瀆等處尤盛

常熟縣

孟秋三十日爲地藏生日東嶽行宮之西有證度菴士女進香極盛

嘉定縣

處暑有雨則物成熟諺云處暑若還天不雨縱然結實也難收

崇明縣

七月三十日俗名地藏開眼日是夜沿街燃燭

武進縣

七月初三日縣城隍生日邑神廟建不久神無定名想卽以塑像之日爲生日歟是日雲車演戲如

郡神生日